

Gereja sedunia tolak

AI dalam PEPERANGAN

GENEVA: Majlis Gereja-gereja Sedunia (WCC) telah menyertai hampir 200 organisasi masyarakat sivil dalam menyeru larangan penggunaan kecerdasan buatan (AI) dalam operasi pembunuhan ketenteraan berasaskan AI, sambil memberi amaran bahawa teknologi tersebut menimbulkan risiko yang semakin besar terhadap martabat manusia dan undang-undang antarabangsa.

Badan ekumenikal itu mengumumkan pada Jun 15 bahawa ia telah menandatangani satu kenyataan bersama yang menggesa kerajaan dan syarikat teknologi menghentikan pembangunan serta penggunaan sistem AI dalam operasi penentuan sasaran dan serangan maut ketenteraan.

Seruan tersebut dibuat ketika Pejabat Hal Ehwal Perlucutan Senjata Pertubuhan Bangsa-Bangsa Bersatu (PBB) mengadakan perbincangan tidak rasmi pada Jun 15 hingga 17 mengenai "Kecerdasan Buatan dalam Domain Ketenteraan dan Implikasinya terhadap Keamanan dan Keselamatan Antarabangsa".

Kenyataan itu mengenal pasti beberapa teknologi yang menimbulkan kebimbangan, termasuk sistem AI yang menyokong keputusan ketenteraan, sistem mengenal pasti sasaran, alat pengawasan biometrik jarak jauh, serta model AI pelbagai modaliti termasuk model yang mampu memahami dan menjana bahasa manusia (*large language models*).

Pengumuman tersebut juga dibuat susulan penerbitan *Magnifica Humanitas*, ensiklik pertama Sri Paus Leo XIV yang memberi tumpuan kepada kecerdasan buatan dan perlindungan martabat manusia dalam era digital.

"Para sarjana dan pengamal undang-undang, pakar teknikal, pekerja teknologi, pelapor khas PBB serta wartawan penyiasatan telah lama memberi amaran terhadap pembangunan dan penggunaan AI dalam peperangan kerana risiko yang lebih tinggi berlakunya jenayah antarabangsa," menurut kenyataan itu.

Kenyataan tersebut menambah bahawa "penggunaan sebenar di lapangan menunjukkan AI menggalakkan kaedah peperangan yang lebih ganas, tidak berperikemanusiaan dan lebih merosakkan," walaupun ada pihak yang berpendapat bahawa teknologi sedemikian boleh menjadikan operasi ketenteraan lebih berkesan atau lebih tepat.

Para penandatangan turut menggesa negara-negara memastikan sistem AI tidak direka, dibangunkan atau digunakan dengan cara yang menyumbang kepada pelanggaran undang-undang kemanusiaan antarabangsa dan undang-undang hak

asasi manusia antarabangsa.

Kumpulan itu juga menegaskan bahawa "sistem AI masih belum cukup boleh dipercayai untuk menggerakkan senjata autonomi sepenuhnya" dan menegaskan bahawa "pihak yang memilih untuk menggunakan sistem AI bagi melakukan jenayah antarabangsa mesti dipertanggungjawabkan secara jenayah."

Peter Prove, Pengarah Suruhanjaya Gereja-gereja bagi Hal Ehwal Antarabangsa WCC, berkata senjata autonomi yang beroperasi tanpa kawalan manusia yang bermakna merupakan "salah satu cabaran moral paling besar dalam kalangan pelbagai persoalan etika yang timbul akibat pengaruh AI yang semakin meluas dalam kehidupan dan masyarakat kita."

"Itulah sebabnya WCC sejak sekian lama memperjuangkan pengharaman awal terhadap apa yang dikenali sebagai 'robot pembunuh' (*killer robots*)," katanya. **LICAS News**

Hidupkan semula budaya ziarah warga emas

VATIKAN: "Melalui Nabi Yesaya, Tuhan berjanji bahawa Dia tidak akan melupakan seorang pun daripada kita. Dia meyakinkan kita bahawa Dia telah mengukir wajah kita pada telapak tangan-Nya (rujuk Yesaya 49:16) dan bahawa kasih-Nya jauh lebih besar daripada kasih seorang ibu terhadap anaknya (rujuk Yesaya 49:15)."

Kata-kata penuh penghiburan ini disampaikan oleh Sri Paus Leo XIV sempena Hari Sedunia Datuk, Nenek dan Warga Emas Keenam yang akan disambut

pada hari Minggu keempat bulan Julai, dengan tema "Aku tidak akan melupakan engkau" (Yesaya 49:15), yang diterbitkan oleh Vatikan pada Jun 16 lalu.

Sri Paus Leo XIV menegaskan bahawa kata-kata Nabi Yesaya menjadi peringatan bahawa Tuhan tidak pernah melupakan anak-anak-Nya, terutama mereka yang dalam usia lanjut dan sering berasa kesunyian, tersisih atau tidak dipedulikan.

Dalam mesej itu, Bapa Suci menegaskan bahawa Gereja dipanggil menjadi

ibu kepada semua orang dan setiap individu, tanpa mengira usia, tetap merupakan anak-anak Tuhan yang dikasihi.

Sri Paus juga menggalakkan golongan muda menziarahi datuk dan nenek serta warga emas yang kesunyian.

Beliau turut menegaskan bahawa tidak pernah terlambat untuk kembali kepada Tuhan kerana Tuhan sentiasa mendekati setiap orang dengan kasih dan kelembutan-Nya.

Sri Paus Leo menegaskan bahawa warga emas tidak perlu takut akan kerapuhan

kerana mereka masih dipanggil untuk terus bertumbuh dalam iman dan harapan.

Beliau juga menggesa warga emas agar terus mendoakan keamanan dunia, khususnya ketika banyak negara sedang dilanda peperangan dan ketidakstabilan.

Mengakhiri mesejnya, Sri Paus mengucapkan terima kasih atas doa-doa mereka, sambil mengingatkan bahawa "Tuhan sentiasa meneguhkan umat-Nya dalam iman, harapan dan kasih kerana Dia tidak pernah melupakan kita.." **Media Vatikan**

Bunuh Diri: Tragedi yang memerlukan pemahaman

Saya biasanya berusaha menggunakan bahasa yang sensitif dan peka terhadap sensitiviti masyarakat, walaupun kadangkala perkara itu boleh menjadi memenatkan kerana wujudnya pelbagai sensitiviti yang menyebabkan sesetengah orang mudah tersinggung. Ringkasnya, hampir apa sahaja perkataan boleh menimbulkan rasa tersinggung kepada seseorang.

Namun, walaupun kita kadangkala berasa kecewa dengan mereka yang terlalu mudah tersinggung, kita juga perlu mengakui bahawa pada masa lalu kita sering terlalu cuai dan tidak peka dalam cara kita menyebut atau menggambarkan sesuatu.

Perbendaharaan kata kita kadangkala menyakitkan hati, khususnya terhadap mereka yang sudah pun menanggung penderitaan.

Kita mempunyai terlalu banyak istilah yang bersifat menghina atau merendahkan mereka yang berbeza daripada kita, serta mereka yang hidup dengan pelbagai bentuk kecacatan.

Dengan itu, saya ingin mencadangkan satu perubahan dalam cara kita bercakap tentang bunuh diri.

Lazimnya kita mengatakan seseorang itu “meninggal dunia akibat bunuh diri”. Saya berpendapat ungkapan itu perlu disingkirkan daripada perbendaharaan kata kita apabila membincangkan isu bunuh diri.

Hanya segelintir mereka yang meninggal dunia akibat bunuh diri benar-benar membuat pilihan tersebut secara sadar dan bebas.

Lebih tepat lagi, mereka akhirnya tewas kepada penyakit dan luka batin yang mereka tanggung sama seperti seseorang tewas kepada kanser, strok atau serangan jantung.

Lima belas tahun lalu, saya didiagnosis menghidap kanser. Saya tidak “melakukan” kanser; penyakit itu mengatasi sistem imun saya tanpa kerelaan saya. Begitu juga dengan strok atau serangan jantung. Tiada siapa yang “melakukan” strok atau serangan jantung. Penyakit itu melemahkan sistem imun tubuh kita.

Secara fizikal, kita mempunyai sistem imun yang bertindak seperti anggota polis yang

sentiasa berkawal, memantau kesihatan kita, mencari bakteria, virus dan sel-sel berbahaya lalu memusnahkannya sebelum ia berkembang dan merosakkan tubuh.

Namun kadangkala, atas pelbagai sebab, penyakit boleh menembusi sistem pertahanan itu.

Kesihatan kita merosot dan kita meninggal dunia kerana perlindungan semula jadi tubuh telah dikalahkan oleh bakteria, virus, kegagalan organ penting atau sel kanser. Kita tidak memilih penyakit itu. Kita tidak “melakukan” penyakit.

Perkara yang sama berlaku kepada kesihatan mental. Kita juga mempunyai mekanisme pertahanan psikologi dan emosi yang sentiasa menjaga kesejahteraan mental kita.

Namun, seperti kesihatan fizikal, kadangkala satu faktor atau gabungan beberapa faktor — seperti genetik, trauma, kemurungan klinikal atau keadaan hidup yang tragis — boleh mengatasi sistem pertahanan psikologi dan emosi tersebut.

Akibatnya, seseorang boleh tewas kepada penderitaan mental yang akhirnya membawa kepada bunuh diri. Saya percaya inilah yang berlaku dalam kebanyakan kes bunuh diri. Sudah tentu ada pengecualian, tetapi ia bukan kebiasaan.

Memang ada keadaan di mana seseorang secara sadar memilih untuk menamatkan hidupnya.

Dalam kes seperti itu, dia tidak bertindak akibat tekanan atau gangguan yang menguasainya tetapi membuat pilihan secara aktif. Oleh itu, kita boleh membezakan antara memilih untuk membunuh diri dan meninggal dunia akibat bunuh diri yang berpunca dari-

pada penderitaan mental yang berat.

Seseorang boleh membunuh dirinya kerana kesombongan atau keangkuhan: “Saya terlalu istimewa untuk hidup bersama orang lain. Dunia ini tidak menghargai keistimewaan saya. Lebih baik saya mati daripada terus hidup.”

Itulah perbezaan antara bunuh diri yang lahir daripada keangkuhan dan bunuh diri seorang insan yang terlalu terluka dan tidak lagi mampu meneruskan perjuangan hidup.

Yang pertama membuat pilihan bunuh diri secara sadar dan sengaja; yang kedua meninggal dunia kerana kelemahan dan penderitaan.

Namun begitu, kita juga tidak seharusnya cepat menghakimi sesiapa. Siapa tahu apakah luka atau gangguan yang telah mengatasi sistem pertahanan mental mereka?

Dengan itu, izinkan saya mengulangi beberapa kebenaran penting tentang bunuh diri yang perlu terus diingatkan:

Dalam kebanyakan kes bunuh diri:

- Kita sedang berhadapan dengan seseorang yang sangat sensitif atau mengalami penderitaan emosi sehingga tidak lagi mampu menerima bantuan atau sokongan.

- Mereka yang meninggal dunia akibat bunuh diri sebenarnya meninggal dunia bertentangan dengan kehendak terdalam mereka.

- Cara kematian mereka boleh diibaratkan seperti seseorang yang melompat dari bangunan tinggi kerana pakaiannya sedang terbakar.

- Bunuh diri boleh dianggap setara dengan “kanser emosi”, “strok emosi” atau “seran-

gan jantung emosi”.

- Dalam banyak kes, kemurungan yang membawa kepada bunuh diri mempunyai faktor biokimia.

- Bunuh diri bukanlah tindakan putus asa secara sengaja. Seseorang tidak memilih untuk kehilangan harapan; sebaliknya luka dan penyakit mengatasi harapan tersebut.

- Bunuh diri bukanlah tindakan mementingkan diri sendiri, walaupun kadangkala ia kelihatan demikian.

- Kita tidak perlu terlalu bimbang tentang keselamatan kekal mereka yang meninggal dunia akibat bunuh diri. Belas kasihan dan pemahaman Tuhan jauh lebih mendalam daripada pemahaman manusia.

- Apabila seseorang yang kita kenal dan kasihi meninggal dunia akibat bunuh diri, salah satu tugas kita ialah memulihkan kenangan tentang dirinya supaya segala kebaikan yang dibawanya kepada dunia tidak dipadamkan hanya kerana cara dia meninggal dunia.

Meninggal dunia akibat serangan jantung, kanser atau strok memang menyedihkan dan tragis tetapi tidak memalukan.

Begitu juga dengan bunuh diri. Ia adalah satu tragedi yang menyedihkan, tetapi bukan sesuatu yang memalukan. Malah, mungkin ia merupakan antara bentuk kematian yang paling sunyi dan menyayat hati, lalu memerlukan belas kasihan dan pemahaman yang istimewa. Apabila bercakap tentang bunuh diri, bahasa yang kita gunakan perlu mencerminkan belas kasihan tersebut. Untuk itu, kita perlu berhenti mengungkapkan: “dia mati akibat bunuh diri.” **Hakcipta Terpelihara 1999-2026 @ Fr Ron Rolheiser**

Berkat yang tidak disangka

Pernahkah kita menerima tetamu yang datang ke rumah secara tidak dijangka? Walaupun pada mulanya kita berasa sedikit cemas kerana perlu menyediakan makanan atau tempat berehat, kita tetap menyambut mereka dengan baik. Selepas mereka pulang, sering kali kita berasa gembira kerana dapat berbuat sesuatu untuk orang lain. Kadangkala, hubungan persahabatan yang erat atau berkat yang tidak disangka-sangka lahir daripada tindakan kecil menerima seseorang dengan hati yang terbuka.

Sabda Tuhan pada Hari Minggu Biasa Ke-13 ini berbicara tentang sikap menerima dan memberi tempat kepada Tuhan dalam hidup kita.

Dalam pembacaan pertama, seorang wanita dari Sunem membuka pintu rumahnya kepada Nabi Elisa dan menerima berkat yang besar daripada Tuhan.

Dalam Injil pula, Yesus mengajar bahawa sesiapa yang menerima seorang murid-Nya sebenarnya menerima Dia sendiri.

Semua ini mengingatkan kita bahawa apabila kita membuka hati kepada Tuhan dan karya-Nya, hidup kita juga akan dipecah dengan rahmat dan berkat-Nya.

Berbalik kepada pembacaan pertama (2 Raja-raja 4:8-11, 14-16), kita mendengar kisah seorang perempuan Sunem yang dengan murah hati menerima Nabi Elisa ke dalam rumahnya.

Dia tidak melihat Elisa sekadar sebagai seorang pengembara, tetapi sebagai seorang hamba Tuhan.

Oleh sebab keramahtamahan dan

imannya, Tuhan memberkatinya dengan anugerah yang tidak disangka-sangka, iaitu seorang anak lelaki, walaupun sebelum itu dia hidup tanpa harapan untuk mempunyai zuriat.

Kisah ini mengingatkan kita bahawa setiap kali kita membuka hati kepada Tuhan, Tuhan juga membuka pintu rahmat-Nya kepada kita.

Kadangkala berkat Tuhan hadir dalam bentuk yang tidak kita jangka. Kita mungkin tidak menerima apa yang kita minta, tetapi Tuhan sentiasa memberikan apa yang kita perlukan.

Dalam pembacaan kedua (Roma 6:3-4, 8-11), Santo Paulus mengingatkan bahawa melalui pembaptisan, kita telah dipersatukan dengan kematian dan kebangkitan Kristus.

Ini bermakna kehidupan Kristiani bukan sekadar mematuhi peraturan agama, tetapi satu kehidupan baharu. Kita dipanggil untuk meninggalkan cara hidup lama yang dikuasai dosa dan hidup sebagai manusia yang diperbaharui oleh rahmat Tuhan.

Namun kehidupan baharu ini menuntut keberanian. Menjadi murid Kristus bukanlah jalan yang sentiasa mudah. Kadangkala kita perlu melawan kelemahan diri sendiri, mengampuni mereka yang menyakiti kita, atau tetap berbuat baik walaupun tidak dihargai.

Semua ini adalah sebahagian daripada hidup baharu yang lahir daripada pembaptisan.

Injil pada Hari Minggu Biasa ke-13 (Matius 10:37-42) mungkin kedengaran men-

cabar. Yesus berkata bahawa sesiapa yang lebih mengasihi bapa, ibu, anak lelaki atau anak perempuan daripada-Nya tidak layak bagi-Nya. Yesus bukan mengajar kita supaya mengabaikan keluarga.

Sebaliknya, Dia mengingatkan bahawa Tuhan harus menjadi pusat kehidupan kita.

Apabila Tuhan berada di tempat pertama, kita akan lebih mampu mengasihi keluarga, sahabat dan sesama manusia dengan kasih yang benar.

Tetapi apabila perkara lain menggantikan tempat Tuhan dalam hidup kita, kita mudah kehilangan arah dan membuat keputusan berdasarkan kepentingan diri sendiri.

Yesus juga berkata, “Sesiapa tidak memikul salibnya dan mengikut Aku, ia tidak layak bagi-Ku.”

Salib setiap orang berbeza. Ada yang memikul salib penyakit, kesedihan, kegagalan, konflik keluarga atau ketidakpastian masa depan. Kita sering berdoa agar salib itu diangkat. Namun Yesus mengajar bahawa salib juga boleh menjadi jalan yang membawa pertumbuhan iman dan kedekatan dengan Tuhan.

Pada penghujung Injil, Yesus memberikan satu janji yang indah. Malah secawan air yang diberikan kepada seseorang atas nama Kristus tidak akan kehilangan ganjarannya. Ini mengingatkan kita bahawa dalam pandangan Tuhan, perkara kecil yang dilakukan dengan kasih mempunyai nilai yang besar.

Senyuman, kata-kata penghiburan, bantuan kepada jiran, kesabaran terhadap ahli

**HARI MINGGU BIASA KE-13
TAHUN A**

**2 RAJA-RAJA 4: 8-11, 14-16,
ROMA 6:3-4, 8-11;
INJIL MATIUS 10:37-42.**



keluarga atau doa untuk seseorang yang menderita – semuanya berharga di mata Tuhan.

Pada Hari Minggu Biasa ke-13 ini, Sabda Tuhan mengajak kita bertanya kepada diri sendiri: Adakah Kristus benar-benar menjadi pusat hidup saya? Adakah saya sanggup memikul salib harian demi mengikut-Nya? Dan adakah saya melihat setiap peluang untuk berbuat baik sebagai peluang untuk melayani Kristus?

Semoga melalui teladan wanita dari Sunem, ajaran Santo Paulus dan kata-kata Yesus dalam Injil hari ini menjadikan kita semakin berani menerima Kristus dengan sepenuh hati, hidup dalam rahmat pembaptisan dan menjadi saksi kasih Tuhan dalam dunia yang memerlukan harapan dan belas kasihan. **Sr Clara Jacinta OP**

Sinodaliti: Mendengar, berjalan dan melayani bersama

ROMA: Ziarah *ad limina* para uskup Malaysia ke Roma baru-baru ini bukan sekadar memenuhi kewajiban Gereja sejagat, tetapi turut menjadi pengalaman rohani yang mendalam, memperbaharui semangat mereka untuk terus melayani umat dan memperkukuh misi Gereja tempatan.

Bagi Uskup Agung Kota Kinabalu, John Wong, ziarah tersebut memberikan peluang untuk merenung semula asas panggilannya sebagai pengganti para rasul.

Beliau berkata bahawa berdoa di makam Santo Petrus dan Santo Paulus menjadi saat yang amat bermakna kerana mengingatkan para uskup bahawa Gereja dibina atas iman para rasul dan diteruskan melalui kesetiaan generasi demi generasi.

Menurut beliau, pengalaman itu meneguhkan kesedaran bahawa para uskup dipanggil untuk menjaga dan menyampaikan

kan iman yang sama yang diwariskan oleh Kristus kepada Gereja.

Dalam dunia yang sentiasa berubah dan berdepan pelbagai cabaran, ziarah tersebut menjadi peringatan bahawa Gereja kekal bersatu dalam satu iman, satu harapan dan satu misi.

Pertemuan bersama Sri Paus Leo XIV turut memberi kesan mendalam. Uskup Agung Wong berkata, salah satu mesej yang paling menyentuh hati beliau ialah panggilan untuk menjadi saksi iman melalui tindakan dan bukannya sekadar kata-kata. Menurutnya, umat Kristian dipanggil untuk menghidupi Injil dalam kehidupan seharian melalui pelayanan, kasih dan perhatian terhadap sesama manusia.

Beliau turut menegaskan bahawa perjalanan sinodal yang sedang diperkukuh oleh Gereja sejagat perlu diterjemahkan dalam kehidupan komuniti setempat.

Sinodaliti bukan sekadar berjalan bersama, tetapi juga mendengar antara satu sama lain, menghargai karunia yang berbeza serta bekerjasama dalam semangat persekutuan dan penyertaan.

Sementara itu, Uskup Melaka-Johor, Bernard Paul, menyifatkan salah satu pengalaman paling menyentuh sepanjang ziarah tersebut ialah menyaksikan ribuan penganut agama lain turut berhimpun di Dataran Santo Petrus untuk menghadiri doa Angelus yang dipimpin oleh Sri Paus.

Bagi beliau, peristiwa itu menjadi tanda nyata bahawa Gereja dipanggil untuk berdialog dan membina jambatan persaudaraan dengan semua orang.

Beliau berkata, dunia hari ini sering dicorakkan oleh perpecahan dan ketegangan, namun pengalaman di Roma menunjukkan bahawa Gereja boleh menjadi ruang pertemuan yang menyatukan manusia daripada pelbagai latar belakang agama, budaya dan bangsa.

Uskup Bernard turut berkongsi bahawa pengalaman perjalanan ke Roma mengajarnya tentang kesabaran dan ketabahan. Gangguan penerbangan, kelewatan serta perubahan jadual yang tidak dijangka menjadi sebahagian daripada perjalanan tersebut.

Namun, beliau melihat semua itu sebagai peringatan bahawa kehidupan dan pelayanan Gereja tidak sentiasa berjalan mengikut rancangan manusia.

Menyentuh mengenai sinodaliti, beliau menegaskan bahawa ia bukan sekadar program atau slogan pastoral.



Kardinal Michael Czerny, SJ, melihat cenderamata yang disampaikan oleh Uskup Bernard Paul ketika pertemuan di Dikasteri bagi Menggalakkan Pembangunan Insan Menyeluruh.

Sebaliknya, sinodaliti merupakan cara Gereja hidup dan bertumbuh sebagai komuniti yang mendengar, berdialog dan membuat keputusan bersama.

Menurut beliau, para pemimpin Gereja perlu terus memupuk budaya penyertaan agar setiap anggota umat berasa dihargai dan diberi ruang untuk menyumbang kepada kehidupan Gereja.

Selepas kembali dari Roma, kedua-dua uskup menyuarakan harapan agar umat terus berjalan bersama sebagai satu keluarga Tuhan.

Mereka menegaskan bahawa pembaharuan sejati bermula apabila umat membuka hati kepada Roh Kudus dan bersedia untuk mendengar antara satu sama lain dengan rendah hati.



Uskup Agung John Wong menyampaikan plak kenang-kenangan kepada Msgr Dario Gervasi, Setiausaha Tambahan Dikasteri bagi Awam, Keluarga dan Kehidupan.

Doa umat jadi kekuatan para paderi

KOTA KINABALU: Umat Katolik berhimpun di Katedral *Sacred Heart*, Kota Kinabalu, untuk merayakan Hari Raya Hati Kudus Yesus dalam suasana penuh syukur dan doa.

Perayaan itu mengajak umat merenungkan kerahiman Kristus yang tidak terbatas, yang mengalir daripada Hati Kudus-Nya.

Melalui perayaan tersebut, umat diingatkan bahawa mereka sentiasa dikasihi, diterima dan dipanggil untuk berkongsi kasih Tuhan dengan sesama.

Di penghujung Misa, Uskup Agung Kota Kinabalu, John Wong, merakamkan penghargaan kepada umat atas doa dan sokongan yang sentiasa diberikan kepada para paderi dan uskup.

"Terima kasih atas doa-doa saudara dan saudari untuk para paderi dan uskup. Doa anda merupakan sumber kekuatan dan sokongan yang besar bagi kami. Teruslah mendoakan kami," kata Uskup Agung John Wong. **Diana Bernadine**



Pesta Corpus Christi di Kampung Kundang Asli

KAMPUNG KUNDANG ASLI, Pahang: Komuniti Katolik Kampung Kundang Asli merayakan Hari Raya Tubuh dan Darah Kristus dengan meriah pada Jun 7 lalu.

Perayaan dimulakan dengan Misa Kudus pada jam 3.30 petang yang dipimpin oleh paderi paroki Gereja St Thomas Rasul, Fr George Packiasamy. Selepas Misa, umat menyertai perarakan Ekaristi mengelilingi kampung.



Pentecost Rally 2026 perkukuh hubungan dengan Roh Kudus

KOTA KINABALU: Hampir 800 peserta berhimpun di Dewan Pusat Paroki Katedral *Sacred Heart* bagi menyertai *Pentecost Rally 2026*, satu perhimpunan yang memperkukuh iman, perpaduan dan penghayatan terhadap karya Roh Kudus dalam kehidupan umat.

Program yang berlangsung pada Jun 13-14 itu menghimpunkan umat dari pelbagai latar belakang untuk berdoa, beribadat dan memperdalam hubungan mereka dengan Kristus.

Melalui sesi perkongsian, doa, pujian dan penyembahan, para peserta diajak membuka hati kepada kuasa Roh Kudus yang membaharui dan menguatkan iman.

Hari kedua perhimpunan menyaksikan pelbagai aktiviti rohani yang membantu peserta memahami peranan Roh Kudus

dalam kehidupan harian.

Suasana penuh sukacita dan semangat persaudaraan jelas dirasai apabila umat bersama-sama memuji dan memuliakan Tuhan sebagai satu keluarga iman.

Perhimpunan tersebut diakhiri dengan Misa Kudus yang dipimpin oleh Monsignor Nicholas Stephen.


Dalam homilinya, beliau mengingatkan umat agar terus hidup sebagai murid Kristus yang setia dan menjadi saluran kasih Tuhan dalam keluarga, paroki dan komuniti masing-masing.

Pentecost Rally 2026 bukan sahaja menjadi kesempatan untuk mendalami hubungan dengan Tuhan, tetapi juga memperbaharui komitmen umat untuk menghayati Injil dalam kehidupan seharian. **Andrea Barnadine**

Sahabat kecil Yesus

Sesiapa yang memberi secawan air sejuk kepada murid-Ku tidak akan kehilangan ganjarannya.

(Matius 10:42)



Anak-anak yang dikasihi,

Apa khabar? Auntie harap anak-anak dalam keadaan yang sihat selalu.

Anak-anak, Injil pada hari Minggu biasa ke-13 mengajar kita bahawa Yesus perlu menjadi yang paling penting dalam hidup kita.

Ini tidak bermaksud kita tidak perlu mengasihi ibu, ayah atau keluarga. Sebaliknya, apabila kita mengasihi Yesus, kita akan lebih mengasihi dan menghormati keluarga serta orang lain.

Yesus juga berkata bahawa kita perlu memikul salib dan mengikut-Nya. Bagi kanak-kanak, "memikul salib" boleh bermaksud melakukan perkara yang betul walaupun susah, seperti berkongsi mainan, meminta maaf apabila bersalah, membantu ibu bapa, dan berdoa setiap hari.

Dalam Injil ini, Yesus mengingatkan bahawa setiap kebaikan yang kita lakukan sangat berharga di mata Tuhan.

Walaupun hanya memberi secawan air kepada seseorang yang memerlukan, Tuhan melihat dan menghargainya.

Semoga pembacaan Injil pada hari Minggu ini menyegarkan iman anak-anak.

Salam Sayang
Auntie Melly

Bolehkah anak-anak meneka TIGA sakramen Gereja Katolik?

1. Sakramen ini biasanya kita terima semasa bayi. Air dicurahkan ke atas kepala sebagai tanda kita menjadi anak Tuhan.
Jawapan: _____
Petunjuk: Bermula dengan huruf B
2. Dalam sakramen ini, uskup mengurapi dahi kita dengan minyak suci dan kita menerima Roh Kudus.
Jawapan: _____
Petunjuk: Bermula dengan huruf K
3. Dalam Misa Kudus, roti dan anggur menjadi Tubuh dan Darah Kristus.
Jawapan: _____
Petunjuk: Kita menerimanya semasa Komuni Pertama.

Tandakan sakramen yang sudah anak-anak terima:

- ☐ Pembaptisan
- ☐ Ekaristi
- ☐ Krisma

JOM LENGKAPKAN SABDA YESUS!


Arahan: Baca petikan Injil di bawah dengan teliti. Kemudian, lengkapkan tempat kosong dengan perkataan yang betul.

1. Sesiapa yang tidak memikul _____ nya dan _____ Aku, tidak _____ bagi-Ku. (Matius 10:38)
2. Sesiapa yang _____ kamu, menerima Aku; dan sesiapa yang menerima _____, menerima _____ yang mengutus Aku. (Matius 10:40)
3. Dan sesiapa yang memberi _____ air sejuk kepada salah seorang yang _____ ini kerana dia murid-Ku, sesungguhnya Aku berkata kepadamu, dia tidak akan _____ ganjarannya. (Matius 10:42)

Ayat Hafalan:
"Sesiapa yang tidak memikul salibnya dan mengikut Aku, tidak layak bagi-Ku."
(Matius 10:38)

salib kehilangan aku kecil menerima
secawan Dia layak mengikut

BELIA



PAG bantu remaja kenali diri dan tujuan hidup

JOHOR BAHRU: Gereja Immaculate Conception (CIC) baru-baru ini menganjurkan program *Persons Are Gifts* (PAG), sebuah program pembentukan remaja yang diasaskan oleh mendiang Fr Ignatius Huan di Melaka pada penghujung tahun 1980-an.

Program selama tiga hari dua malam itu disertai oleh remaja berusia 13 hingga 15 tahun dan bertujuan membantu mereka mengenali diri sendiri serta melihat setiap individu sebagai anugerah Tuhan yang unik dan berharga.

Dengan menggunakan simbol hadiah yang dibungkus, para peserta diajak memahami bahawa nilai sebenar seseorang terletak pada keindahan dan bakat yang ada di dalam dirinya, bukan pada penampilan luaran.

Dikendalikan oleh Eugene Wong, Jason Joseph dan Annabel Loh, program tersebut merangkumi sesi berasaskan Kitab Suci, pujian dan penyembahan serta perkongsian dalam kumpulan kecil.

Aktiviti-aktiviti ini memberi peluang kepada para peserta untuk berkongsi pengalaman hidup, membina persahabatan dan memperdalamkan hubungan mereka dengan Tuhan.

Kem tersebut diakhiri dengan sesi penghargaan sesama peserta, yang menggalakkan mereka mengenali dan menghargai bakat serta kelebihan yang dimiliki oleh diri sendiri dan orang lain.

Maklum balas peserta menunjukkan kesan positif program itu. Ramai menyatakan bahawa PAG membantu mereka mengenali diri dengan lebih baik, membina keyakinan diri, menghargai ibu bapa, menjalin persahabatan baharu serta memperkukuh iman mereka.

Salah seorang peserta, Dayna Fae Pichay Sta Maria, berkata PAG membantunya mengenali diri sendiri, menghargai bakat orang lain serta mendekatkan dirinya kepada Tuhan.

Melvan Maavalan Mathew pula menyifatkan kem itu sebagai pengalaman yang tidak dapat dilupakan kerana memberikan banyak pengajaran hidup, persahabatan baharu dan kenangan berharga.

Sementara itu, Gabriel Jetesh Vadi Velu berkata PAG membantunya memahami dirinya dengan lebih baik, terutama melalui sesi hubungan ibu bapa dan anak, serta menyedarkannya bahawa setiap individu mempunyai anugerah tersendiri yang tidak boleh dinilai berdasarkan penampilan luaran.

Gereja bantu kaum muda Ukraine



temui harapan

KYIV, Ukraine: Di tengah-tengah peperangan yang masih berlautan, Gereja Katolik di Ukraine terus berusaha memastikan kanak-kanak dan remaja tidak kehilangan harapan, kegembiraan serta peluang untuk berkembang sebagai generasi masa depan.

Dalam temu bual bersama Media Vatikan, Iryna Nazarenko, Setiausaha Komisi Belia Keuskupan Kyiv-Zhytomyr, berkongsi bagaimana Gereja berusaha mendampingi golongan muda yang hidup dalam suasana peperangan, ketidakpastian dan trauma.

Beliau menjelaskan bahawa antara cabaran terbesar ialah membantu kanak-kanak mengekalkan semangat hidup dan menikmati zaman kanak-kanak mereka walaupun siren serangan udara dan ancaman perang menjadi sebahagian daripada kehidupan harian.

Menurut beliau, pelbagai program pastoral dianjurkan untuk membantu golongan muda membina daya tahan rohani dan emosi.

Antaranya termasuk pertemuan belia, aktiviti komuniti,

perkhemahan musim panas, sukan serta sesi pembentukan iman yang memberi ruang kepada mereka untuk berdoa, berkongsi pengalaman dan saling menyokong.

Aktiviti sukan dilihat sebagai alat penting untuk memupuk persahabatan, disiplin dan harapan dalam kalangan kanak-kanak yang terkesan oleh peperangan.

Nazarenko turut menceritakan bagaimana ramai kanak-kanak menulis surat kepada anggota tentera di barisan hadapan sebagai tanda sokongan dan penghargaan.

Surat-surat tersebut bukan sahaja memberi semangat kepada para tentera, malah membantu kanak-kanak meluahkan perasaan mereka serta merasakan bahawa mereka juga mampu menyumbang kepada masyarakat dalam keadaan yang sukar.

Walaupun berdepan pelbagai cabaran, Gereja terus menekankan kepentingan doa bersama dan kehidupan sakramental.

Momen doa komuniti membantu umat, khususnya golongan muda, merasakan bahawa

mereka tidak bersendirian dalam menghadapi penderitaan. Iman menjadi sumber kekuatan yang membolehkan mereka terus memandang masa depan dengan penuh harapan.

Nazarenko mengakui bahawa terdapat saat-saat keletihan dan keputusan. Namun beliau berkata kekuatan untuk terus melayani datang daripada doa, Ekaristi serta keyakinan bahawa Tuhan sentiasa hadir bersama mereka. Dalam keadaan peperangan yang berterusan, Gereja berusaha menjadi tanda harapan dengan membantu kanak-kanak dan remaja menemukan semula kegembiraan, persahabatan dan tujuan hidup mereka.

Usaha ini selari dengan seruan berterusan Gereja sejagat untuk mendoakan keamanan di Ukraine dan mendampingi mereka yang menjadi mangsa peperangan. Bagi Gereja di Ukraine, melindungi harapan golongan muda bukan sahaja penting untuk masa kini, tetapi juga untuk masa depan negara yang suatu hari nanti diharapkan dapat dibina semula dalam suasana aman dan damai. **Media**

Kamu ialah umat pilihan Tuhan

IPOH: Pada Jun 13, 2026, Komuniti Katolik Michaelian telah berjaya menganjurkan kem pembentukan iman sehari bertajuk *The Chosen* (1 Petrus 2:9) di St Michael's Institution, Ipoh.

Program tersebut menghimpunkan kira-kira 60 pelajar Kristian berusia antara 13 hingga 18 tahun dengan tujuan membantu mereka menyedari bahawa mereka dikasihi, dihargai dan dipilih oleh Tuhan.

Kem ini dianjurkan sebagai respons kepada cabaran yang dihadapi oleh ramai golongan muda hari ini, yang sering bergelut

dengan perasaan tersisih, tidak dihargai atau merasakan diri tidak cukup baik.

Melalui tema yang dipilih, para peserta diajak untuk mengenali identiti sebenar mereka sebagai umat pilihan Tuhan.

Program dimulakan dengan pendaftaran dan sarapan pagi, diikuti upacara pembukaan yang disempurnakan oleh Presiden Komuniti Katolik Michaelian serta para tetamu jemputan.

Acara turut menyaksikan pelancaran kain rentang kem dan tayangan mesej khas daripada Kardinal Sebastian Francis, Uskup

Pulau Pinang. Para peserta kemudiannya menghadiri Misa Kudus di Kapel St Michael's Institution yang dipimpin oleh Fr Mark Michael sebelum menyertai sesi suai kenal yang membantu mereka membina persahabatan baharu.

Sepanjang program, peserta mengikuti dua sesi pembentukan iman yang dikendalikan oleh Fr Mark Michael dan Encik Clifford Miranda. Mereka juga mengambil bahagian dalam pelbagai permainan berkumpulan yang menggalakkan kerjasama, komunikasi dan kepimpinan.

Antara aktiviti yang paling



memberi kesan ialah drama *Unseen Hands* yang dipersembahkan oleh jawatankuasa penganjur, yang menonjolkan kehadiran dan bimbingan Tuhan dalam kehidupan walaupun tidak selalu dapat dilihat secara nyata.

Secara keseluruhannya, *The Chosen: 1 Petrus 2:9* berjaya memperkukuh keyakinan para peserta bahawa mereka mempunyai tempat yang istimewa dalam rancangan Tuhan serta dipanggil untuk hidup sebagai umat pilihan-Nya.

Berita singkat antarabangsa

Sri Paus doakan ibu bapa yang kehilangan anak

VATIKAN: Sri Paus Leo XIV menyampaikan doa dan sokongan rohaninya kepada ibu bapa yang sedang berduka akibat kehilangan anak, khususnya bayi, sempena Hari Kehidupan 2026 yang akan disambut oleh Gereja di England, Wales, Scotland dan Ireland pada 21 Jun ini.

Dalam mesej yang disampaikan melalui Setiausaha Negara Vatikan, Kardinal Pietro Parolin, Bapa Suci menegaskan bahawa setiap manusia memiliki martabat yang tidak terhingga sejak

saat pembuahan kerana setiap kehidupan dikehendaki, dicipta dan dikasihi oleh Tuhan.

Sri Paus mendoakan agar ibu bapa yang kehilangan anak memperoleh penghiburan dan kedamaian dalam kasih Tuhan serta sokongan daripada komuniti Gereja.

Bapa Suci turut mengucapkan terima kasih kepada semua pihak yang terus mempertahankan martabat dan kesucian kehidupan manusia pada setiap peringkat. **Media Vatikan**

Bapa Suci Leo XIV tarik 2.5 juta umat

MADRID: Lawatan apostolik Sri Paus Leo XIV ke Sepanyol berjaya menarik kira-kira 2.5 juta peserta dan menyumbang lebih AS\$174 juta (sekitar RM740 juta) kepada ekonomi tempatan, menurut penganjur.

Sepanjang lawatan tersebut, jutaan umat menyertai pelbagai acara termasuk Misa, pertemuan dengan golongan muda, program kebudayaan dan sambutan awam di beberapa bandar utama.

Selain memberi manfaat kepada sektor pelancongan, perho-

telan dan perniagaan tempatan, lawatan itu turut disifatkan sebagai pengalaman rohani yang mendalam bagi ramai peserta.

Penganjur menegaskan bahawa nilai sebenar lawatan Sri Paus tidak dapat diukur melalui angka ekonomi semata-mata.

Sebaliknya, lawatan itu telah memperbaharui iman ramai umat, mengukuhkan semangat perpaduan serta membawa mesej harapan, keamanan dan solidariti kepada masyarakat Sepanyol. **UCA News**

Paderi terima anugerah stewardship 2026

MANILA: Seorang paderi dari Keuskupan Agung Tuguegarao, Fr Manuel Vicente "Manny" Catral, menerima Anugerah Memorial Kardinal Ricardo J. Vidal 2026 bagi Pengurusan Sumber (*Stewardship*) sebagai pengiktirafan terhadap usaha beliau memperkukuh Komuniti Gereja Dasar Asas (KKD/KED), penyertaan umat awam dan pembaharuan Gereja berasaskan komuniti.

Beliau diiktiraf kerana membantu membina komuniti Katolik yang lebih bersemangat untuk bermisi, inklusif dan bertanggungjawab, khususnya dalam kalangan masyarakat luar bandar dan terpencil.

Sepanjang pelayanannya, Fr

Catral turut mempromosikan pertanian lestari, penjagaan alam sekitar serta program pembangunan komuniti yang menghubungkan iman dan tindakan sosial.

Menurut pihak penganjur, pendekatan beliau menunjukkan bahawa Gereja menjadi lebih kukuh apabila paderi dan umat bekerjasama dalam semangat pelayanan dan tanggungjawab bersama.

Dalam ucapan semasa menerima anugerahnya, Fr Catral menggesa umat Katolik menjadikan *stewardship* bukan sekadar program pastoral, tetapi satu cara hidup yang berakar pada iman, pelayanan dan kemurahan hati. **LiCAS News**

Uskup pilih tinggal bersama pelarian

LOIKAW, Myanmar: Walaupun Katedral *Christ the King* di Loikaw telah dipulangkan oleh pihak tentera selepas diduduki sejak 2023, Uskup Celso Ba Shwe memilih untuk terus tinggal bersama ribuan pelarian yang kehilangan tempat tinggal akibat konflik berpanjangan di Negeri Karenni.

Uskup itu berkata ramai umatnya kini tinggal di kem pelarian, kawasan pedalaman

dan hutan selepas terpaksa melarikan diri akibat konflik.

Dengan banyak paroki masih ditutup, beliau memilih untuk terus berada bersama umat yang menderita. Sejak rampasan kuasa tentera pada 2021, lebih 300,000 penduduk di Negeri Karenni telah kehilangan tempat tinggal. Keputusan uskup itu dilihat sebagai tanda solidariti Gereja dengan mangsa perang.

LiCAS News

Kashmir bergelut dengan krisis makanan

MUZAFFARABAD, Kashmir: Penduduk di Kashmir yang ditadbir Pakistan berdepan kesukaran mendapatkan makanan dan keperluan harian selepas hampir dua minggu protes berdarah yang mengorbankan sekurang-kurangnya 22 orang.

Protes yang diterajui oleh *Joint Awami Action Committee* (JAAC) menuntut pembaharuan ekonomi dan tadbir urus yang lebih

baik. Penutupan jalan, pasar dan perniagaan telah menjejaskan bekalan makanan serta kehidupan harian penduduk.

Pihak berkuasa telah menahan ratusan individu yang dikaitkan dengan gerakan itu, manakala kumpulan hak asasi manusia menyuarakan kebimbangan terhadap tindakan keras terhadap para penunjuk perasaan. **LiCAS News**



Tuhan tempat perlindungan orang miskin

VATIKAN: Sri Paus Leo XIV menyeru seluruh Gereja agar memperbaharui komitmen terhadap golongan miskin dan terpinggir dengan menjadikan mereka pusat perhatian dalam kehidupan Kristian serta karya pastoral Gereja.

Dalam mesej sempena Hari Orang Miskin Sedunia ke-10 yang akan disambut pada November 15, 2026, Bapa Suci memilih tema, "Tuhan adalah tempat perlindungan orang miskin" (Mazmur 14:6).

Tema tersebut mengingatkan umat bahawa Tuhan tidak pernah meninggalkan mereka yang menderita, sebaliknya sentiasa hadir sebagai sumber harapan, kekuatan dan perlindungan.

Sri Paus menegaskan bahawa kemiskinan bukan sekadar kekurangan material, tetapi sering dikaitkan dengan pengasingan sosial, kehilangan maruah dan ketiadaan peluang untuk membina kehidupan yang lebih baik.

Dalam dunia yang masih dibelenggu peperangan, ketidakstabilan ekonomi, perpindahan paksa dan pelbagai bentuk ketidakadilan, ramai orang terus hidup dalam

keadaan tidak menentu dan tanpa harapan.

Menurut beliau, orang miskin mempunyai tempat istimewa dalam hati Tuhan dan juga dalam kehidupan Gereja.

Oleh itu, umat Kristian tidak boleh melihat mereka sekadar sebagai penerima bantuan atau objek belas kasihan.

Sebaliknya, mereka adalah saudara dan saudari yang membantu Gereja memahami Injil dengan lebih mendalam melalui kesederhanaan, ketabahan dan kepercayaan mereka kepada Tuhan.

Bapa Suci turut mengingatkan bahawa harapan Kristian bukanlah suatu sikap pasif atau sekadar menunggu masa depan yang lebih baik.

Harapan lahir daripada keyakinan bahawa Tuhan sentiasa bertindak dalam sejarah manusia dan mengiringi mereka yang menderita.

Maka, Gereja dipanggil untuk menjadi tanda harapan yang nyata melalui tindakan kasih, solidariti dan pelayanan kepada mereka yang memerlukan.

Sri Paus juga menggesa paroki, komuniti religius dan organisasi Katolik agar terus membuka ruang bagi mendengar suara golongan miskin serta melibatkan mereka dalam kehidupan komuniti.

Menurut beliau, kehadiran mereka bukan satu beban, tetapi anugerah yang mengingatkan Gereja tentang nilai kerendahan hati, persaudaraan dan kebergantungan kepada Tuhan.

Mengakhiri mesejnya, Sri Paus Leo XIV menyeru umat beriman agar tidak bersikap acuh tak acuh terhadap penderitaan sesama manusia.

Sebaliknya, setiap orang dipanggil untuk menjadi alat kasih Tuhan dengan membina masyarakat yang lebih adil, inklusif dan penuh belas kasihan.

Uskup Roma itu menegaskan bahawa Gereja akan menjadi saksi Injil yang lebih berkesan apabila mampu menjadi tempat perlindungan, penghiburan dan harapan bagi golongan miskin, sebagaimana Tuhan sendiri sentiasa menjadi perlindungan bagi mereka yang memerlukan. **Media Vatikan**

Chiang Mai tahbis sembilan paderi

CHIANG MAI, Thailand: Keuskupan Chiang Mai mencipta sejarah apabila mentahbiskan sembilan paderi baharu pada Jun 13 lalu, jumlah terbesar dalam sejarah keuskupan tersebut dan satu pencapaian penting bagi komuniti Katolik Orang Asli di utara Thailand.

Lebih 4,000 umat Katolik dari pelbagai komuniti etnik dan Orang Asli menghadiri Misa pentahbisan Imam yang berlangsung di Katedral *Sacred Heart*, Chiang Mai. Upacara itu dipimpin oleh Uskup Francis Xavier Vira Arpondratana dan bertepatan dengan Pesta Hati Kudus Yesus, pelindung katedral tersebut.

Peristiwa bersejarah itu mencerminkan pertumbuhan Gereja Katolik dalam kalangan masyarakat Orang Asli seperti Karen, Hmong, Lahu, Akha dan Lisu yang mendiami kawasan pergunungan utara Thailand.



Peningkatan panggilan imamat tempatan turut mengukuhkan kehadiran Gereja di kawasan pedalaman yang terpencil.

Keuskupan Chiang Mai kini melayani kira-kira 60,000 umat Katolik dan hampir 4,000 katekumen melalui sekitar 50 paroki dan lebih 700 kampung Katolik.

Pelayanan pastoral disokong oleh kira-kira 100 paderi, 180 biar-

awan dan biarawati serta ratusan katekis awam yang melayani di seluruh wilayah tersebut.

Tahbisan sembilan paderi baharu ini dilihat sebagai tanda harapan bagi masa depan Gereja di utara Thailand, khususnya dalam kalangan komuniti Orang Asli yang terus memainkan peranan penting dalam pertumbuhan iman Katolik di rantau itu. **LiCAS News**

Masyarakat dahagakan asas perpaduan sejati

TAKHTA SUCI: "Umat Tuhan memberikan penghiburan yang besar bagi saya melalui ungkapan iman dan kasih mereka yang penuh sukacita."

Demikian kata Sri Paus Leo XIV semasa Audiens Umum minggunya di Dataran Santo Petrus ketika mengulas perjalanan apostoliknya ke Sepanyol yang meliputi Madrid, Barcelona, Biara Montserrat dan Kepulauan Canary.

Bapa Suci berkata beliau bersyukur atas sambutan hangat yang diberikan oleh rakyat Sepanyol, Raja Sepanyol, pihak berkuasa awam, para uskup dan komuniti Gereja.

Menurut beliau, lawatan tersebut memberikan peluang untuk meneguhkan iman umat serta menggalakkan perpaduan, dialog dan kesatuan dalam kepelbagaian.

Sri Paus turut melahirkan kegembiraan melihat orang ramai daripada pelbagai peringkat umur dan latar belakang menyambut kedatangannya dengan penuh semangat.

Menurut beliau, sambutan itu bukan sesuatu yang boleh dianggap sesuatu yang biasa kerana ia menunjukkan keinginan masyarakat untuk mencari asas perpaduan yang sejati.

"Pada akhirnya, hanya Kristus mampu menjadi asas yang kukuh bagi perpaduan tersebut," tegasnya.

Mengimbas pengalaman sepanjang lawatan itu, Sri Paus berkata pertemuan antara tradisi Katolik yang kaya dan budaya kontemporari membolehkannya melihat kekayaan rohani Eropah sebagai warisan yang masih hidup dan perlu dipelihara.

Beliau menegaskan bahawa warisan itu penting dalam menghadapi cabaran dunia hari ini seperti keamanan, ekologi integral, pembangunan yang adil dan lestari serta penghormatan terhadap martabat manusia.



Sri Paus turut menyatakan bahawa ramai orang yang ditemuinya mengharapkan Gereja terusewartakan Injil harapan kepada dunia yang sedang berdepan pelbagai krisis dan ketidakpastian.

Beliau secara khusus menzahirkan penghargaan terhadap kanak-kanak, golongan miskin, mangsa penderaan, para banduan, golongan muda dan migran yang ditemuinya sepanjang lawatan tersebut.

Menyentuh bahagian terakhir lawatannya, Sri Paus mengulas tentang Gereja tempatan di Kepulauan Canary yang menerima sejumlah besar migran dan pelarian, yang kebanyakannya berasal dari Afrika.

"Kita tahu bahawa fenomena migrasi sangat kompleks dan memerlukan pelan tindakan yang tersusun serta penyelarasan yang berkesan. Namun, situasi ini juga membantu kita melihat isu ini dari sudut yang luas

luas," katanya.

Menurut beliau, pengalaman tersebut membantu umat memahami bagaimana Injil perlu dibaca semula dalam konteks dunia masa kini melalui perkongsian kekayaan budaya antara masyarakat yang berbeza, khususnya buah-buah kebaikan yang lahir daripada pewartaan Kristus dalam setiap budaya. Namun, beliau menegaskan bahawa pengalaman tersebut juga membuka peluang untuk membina dialog, persaudaraan dan saling memperkaya hubungan antara budaya.

Mengakhiri refleksinya, Sri Paus Leo XIV mengulangi moto lawatan tersebut, "Angkatlah pandanganmu!" (Yohanes 4:35), sambil mengajak semua orang untuk memandang kepada Tuhan dan menemui harapan baharu bagi dunia serta masa depan manusia. **Media Vatikan**

PENULIS JEMPUTAN BERKICAU

Ketika Algoritma bertemu penderitaan

Ketika kecerdasan buatan (AI) semakin mempengaruhi kehidupan moden, timbul persoalan penting: adakah teknologi ini benar-benar memahami manusia?

Walaupun AI mampu menghasilkan imej, teks dan analisis yang menakjubkan, ia tetap tidak dapat memahami penderitaan manusia yang sebenar.

AI boleh mengira statistik kemiskinan atau menganalisa gambaran tentang Tuhan dalam beberapa saat, tetapi ia tidak mampu merasai kesakitan, kehilangan, ketakutan atau harapan yang dialami manusia.

Perkembangan AI juga berisiko mewujudkan "realiti buatan" yang dikawal oleh syarikat teknologi besar. Jika tidak dipantau, teknologi boleh mengahakis kebebasan manusia dan menjadikan individu sekadar pengguna pasif kepada sistem yang dibentuk oleh segelintir pihak.

Dalam konteks ini, Sri Paus Leo XIV mengingatkan bahawa tanggungjawab moral perlu wujud pada setiap peringkat pembangunan dan penggunaan AI supaya maruah manusia sentiasa dihormati.

Terdapat tiga dimensi penting untuk memastikan AI benar-benar melayani manusia: Pertama, pada peringkat sosial, AI harus digunakan untuk memperkuat komunikasi, memperkasakan golongan terpinggir dan menyokong perubahan masyarakat yang positif.

Kedua, pada peringkat rohani, AI mungkin dapat menyusun maklumat teologi dan membantu mencari petikan Kitab Suci atau dokumen Gereja dengan pantas, namun ia tidak mampu membangkitkan iman yang hidup. Iman lahir daripada pertemuan peribadi dengan Tuhan melalui doa, sakramen dan kehidupan komuniti yang mengubah hati seseorang untuk mengasihi, melayani dan berkorban demi sesama.

Ketiga, pada peringkat peribadi, manusia perlu terus memupuk empati, belas kasihan dan hubungan yang autentik, sesuatu yang tidak dapat digantikan oleh algoritma.

Walaupun teknologi mampu memudahkan komunikasi dan akses kepada maklumat, ia tidak dapat menggantikan sentuhan kemanusiaan yang lahir daripada kehadiran, perhatian dan kepedulian yang tulus.

Keupayaan untuk mendengar, memahami penderitaan orang lain dan berkongsi kegembiraan serta kesedihan merupakan ciri unik manusia yang perlu terus dipelihara dalam era digital. Masa depan tidak seharusnya ditentukan oleh kecanggihan teknologi semata-mata. Sebaliknya, pembangunan AI mesti berpusat pada manusia, khususnya mereka yang menderita, miskin dan terpinggir.

Hanya dengan meletakkan maruah manusia sebagai asas, teknologi dapat menjadi alat yang membantu membina dunia yang lebih adil, berbelas kasihan dan berperikemanusiaan. **Bro Jaazeal Jakosalem, OAR**

Bro Jaazeal, dari Filipina merupakan penulis dan pembaca setia ensiklik Laudato Si'. Beliau merupakan ahli Pusyon Kinaiyahan, sebuah kumpulan alam sekitar yang berpusat di wilayah Visayas. Kini beliau berpangkalan di Jerman sebagai anggota PCPR-Europe yang terlibat dalam kempen berkaitan perlindungan hak asasi manusia di Filipina.

MARI dan jadilah komuniti pemberita HERALD. Kami amat mengalu-alukan sumbangan artikel, pendapat dan perkongsian kita.

Kami mengalu-alukan artikel dalam 400-500 patah perkataan, gambar high-resolution (300 DPI) dalam format JPG atau PNG serta berkapsyen.

Kita boleh menghantar artikel kepada liza@herald.com.my atau

WhatsApp: 011-26391498

Jus rohani untuk jiwa

Hidup selepas kematian ...

Kematian bukanlah pengakhiran bagi Korang Kristian. Melalui kematian dan kebangkitan Yesus Kristus, Gereja mengajar bahawa kehidupan manusia berterusan di hadapan Tuhan.

Ajaran Katolik tentang kehidupan selepas kematian memberi harapan bahawa maut bukan noktah terakhir, sebaliknya jalan menuju kehidupan kekal.

Berikut ialah 10 perkara yang diajarkan oleh Gereja Katolik tentang kehidupan selepas kematian.

1. Kematian bukan pengakhiran

Bagi orang Kristian, kematian ialah pintu menuju kehidupan kekal.

"Akulah kebangkitan dan hidup; sesiapa yang percaya kepada-Ku akan hidup walaupun dia sudah mati." (Yohanes 11:25)

2. Jiwa terus hidup

Tubuh manusia akan mati, tetapi jiwa tetap hidup di hadapan Tuhan.

"Janganlah takut kepada mereka yang dapat membunuh tubuh tetapi tidak dapat membunuh jiwa." (Matius 10:28)

3. Setiap orang akan dihakimi

Selepas kematian, setiap orang akan dihakimi berdasarkan kehidupannya di hadapan Tuhan.

"Manusia ditetapkan untuk mati hanya satu kali sahaja, dan sesudah itu dihakimi." (Ibrani 9:27)

4. Syurga adalah rumah kekal bagi orang beriman

Mereka yang hidup dalam persahabatan dengan Tuhan akan menikmati kebahagiaan kekal bersama-Nya.

"Di rumah Bapa-Ku banyak tempat tinggal." (Yohanes 14:2)

5. Api Penyucian (Purgatori) merupakan proses penyucian jiwa

Gereja mengajar bahawa sesetengah jiwa memerlukan penyucian sebelum memasuki Syurga.

"Ia akan diselamatkan, tetapi seperti melalui api." (1 Korintus 3:15)

6. Neraka adalah kemungkinan yang nyata

Neraka ialah keadaan pemisahan kekal daripada Tuhan bagi mereka yang menolak kasih dan rahmat-Nya.

"Mereka ini akan masuk ke tempat seksaan yang kekal, tetapi orang benar ke dalam hidup yang kekal." (Matius 25:46)

7. Doa untuk orang mati adalah penting

Sejak awal lagi, Gereja menggalakkan umat mendoakan mereka yang telah meninggal dunia.

"Adalah suatu pemikiran yang kudus dan saleh untuk mendoakan orang mati supaya mereka dibebaskan daripada dosa." (2 Makabe 12:46)

8. Akan ada kebangkitan badan

Pada akhir zaman, tubuh manusia akan dibangkitkan dan dipersatukan semula dengan jiwa.

"Sebab sangkakala akan berbunyi dan orang mati akan dibangkitkan dalam keadaan tidak dapat binasa." (1 Korintus 15:52)

9. Kristus akan datang kembali untuk Penghakiman Terakhir

"Apabila Anak Manusia datang dalam kemuliaan-Nya ... semua bangsa akan dikumpulkan di hadapan-Nya." (Matius 25:31-32)

10. Kehidupan kekal bersama Tuhan adalah harapan orang Kristian

Tujuan akhir manusia ialah hidup selamanya dalam kasih dan kemuliaan Tuhan.

"Dia akan menghapus segala air mata dari mata mereka; maut tidak akan ada lagi." (Wahyu 21:4)

Sepuluh perkara ini hanyalah sebahagian daripada ajaran Gereja Katolik mengenai kehidupan selepas kematian. Masih banyak lagi aspek yang boleh diterokai melalui Kitab Suci, Tradisi Gereja dan ajaran para santo. Namun semuanya membawa kepada satu harapan yang sama: bahawa dalam Kristus, maut bukanlah pengakhiran, tetapi jalan menuju kehidupan kekal bersama Tuhan. **Aleteia**

Kembali ke Yerusalem

BUKIT MERTA JAM: “Jangan kekal di Emaus tetapi kembalilah ke Yerusalem,” demikian kata Kardinal Sebastian Francis kepada para peserta Perhimpunan Pembaharuan Karismatik Katolik Keuskupan Pulau Pinang di Basilika Minor St Anne, pada Jun 1 lalu.

Buat pertama kalinya, umat Katolik daripada empat komuniti bahasa: Bahasa Melayu, Bahasa Inggeris, Bahasa Mandarin dan Bahasa Tamil, berhimpun bersama dalam perhimpunan bertema “Datanglah, Roh Kudus, Perbaharuilah Umat-Mu” (Mazmur 104:30).

Selama sehari, para peserta menyertai sesi pujian dan penyembahan, perkongsian rohani, Adorasi

Ekaristi, doa penyembuhan dan Misa Kudus yang dipimpin oleh Kardinal Sebastian Francis.

Dalam homilinya, Kardinal Sebastian mengingatkan umat agar tidak “kekal di Emaus”, tetapi kembali ke “Yerusalem”, iaitu terus melangkah dalam perjalanan iman dan misi sebagai murid Kristus.

Prelatus itu menjelaskan bahawa Emaus melambangkan tempat para murid mengalami pertemuan peribadi dengan Kristus yang bangkit, manakala Yerusalem melambangkan tempat perutusan dan kesaksian.

Oleh itu, kata Kardinal Sebastian, umat bukan sahaja dipanggil untuk mengalami Tuhan

secara peribadi, tetapi juga diutus untuk kembali kepada masyarakat bagiewartakan Injil dan menjadi saksi kasih Kristus.

Salah seorang peserta, Rosaline Michael dari paroki St Anne, berkata perhimpunan itu membantunya memahami dengan lebih mendalam peranan Roh Kudus dalam kehidupan seharian. “Saya pulang dengan hati yang diperbaharui dan keyakinan yang lebih kuat untuk melayani Tuhan,” katanya.

Seorang lagi peserta, Daniel Wong dari Gereja Holy Spirit, Pulau Pinang, menyifatkan pengalaman berdoa bersama umat daripada pelbagai latar bahasa sebagai sesuatu yang menyentuh



hati. “Walaupun berbeza bahasa, kami disatukan oleh Roh Kudus dan iman yang sama,” ujarnya.

Perhimpunan tersebut bera-

akhir dengan ucapan penghargaan daripada Pengerusi Penganjur merangkap Koordinator Perhimpunan, Encik Sebastian Pillai.

ALC lancar siri pembentukan liturgi

PETALING JAYA: Komisi Liturgi Keuskupan Agung Kuala Lumpur (ALC) telah melancarkan siri pembentukan *Deepening Our Liturgical Life* yang disertai 80 peserta dari 17 paroki di seluruh keuskupan agung.

Sesi pertama bertajuk *Encountering the Sacred: An Introduction to the Liturgy* yang diadakan di Gereja Assumption bertujuan memperdalam pemahaman umat

tentang liturgi serta menggalakkan penyertaan yang lebih sedar, aktif dan bermakna dalam ibadat.

Fr Leonard Lexson, Pembantu Eklesiastik ALC, menjelaskan bahawa liturgi bukan sekadar himpunan upacara atau ritual, tetapi tindakan Kristus yang terus berkarya melalui Gereja.

Beliau turut menekankan bahawa Ekaristi merupakan sumber dan puncak kehidupan Kristiani

serta menggalakkan umat mengalami Misa sebagai pertemuan yang mengubah kehidupan.

Peserta juga mengikuti pembentukan mengenai struktur Misa yang disampaikan oleh pengerusi ALC, Madonna Francis, bersama Sandra Ann.

Sesi itu membantu peserta memahami dengan lebih jelas setiap bahagian Misa dan maknanya dalam kehidupan iman.

Sementara itu, Spencer Klumai menerangkan maksud di sebalik tanda, simbol, postur dan gerak tubuh yang digunakan dalam liturgi Katolik, termasuk berdiri, duduk, berlutut dan membuat tanda salib.

Program diakhiri dengan sesi soal jawab bersama Fr Leonard. Para peserta menyambut baik program tersebut dan menyatakan penghargaan atas peluang untuk memperdalam pemahaman mereka tentang liturgi serta Ekaristi.



Pemberkatan pertama untuk dua sekolah mission di Kuala Penyu

KUALA PENYU: Fr Roney Mailap telah memberkati dua buah sekolah mission, iaitu SK St Stephen, Kiaru dan SK St Joseph, Kabunau baru-baru ini.

Ia merupakan detik bersejarah kerana kedua-dua sekolah di bawah naungan Lembaga Sekolah-sekolah Mission Kuala Penyu itu belum pernah direkodkan menerima pemberkatan sejak ditubuhkan.

SK St Stephen, Kiaru mula beroperasi pada tahun 1961, manakala SK St Joseph, Kabunau ditubuhkan pada tahun 1963.

Kedua-dua sekolah tersebut telah memainkan peranan penting dalam menyediakan pendidikan kepada generasi muda di kawasan berkenaan.

Fr Roney bersama beberapa Pembimbing Ibadat Sabda (PIS)



memimpin upacara pemberkatan di kedua-dua sekolah.

Guru Besar SK St Stephen, En Ijap Kumandu, melahirkan rasa syukur atas upacara pemberkatan tersebut dan memohon doa berterusan untuk warga sekolah.

Dalam ucapannya, Fr Roney me-

negaskan komitmen Gereja untuk terus menyokong pembangunan dan kejayaan sekolah-sekolah mission serta mengajak semua pihak terus bekerjasama demi masa depan anak-anak di bawah naungan St Stephen dan St Joseph. **Stella Eming Dydimus**

Menghayati KAGAPA dalam terang *Laudato Si'*

AIR ITAM, Pulau Pinang: Seramai 40 peserta menghadiri ceramah KAGAPA (Kaamatan, Gawai dan Panen) bertajuk “Dalam Terang *Laudato Si'*” yang berlangsung di Gereja Risen Christ pada Jun 14.

Program anjuran Bahasa *Apostolate* itu disampaikan oleh Friar Cosmas Francis, OFM, yang mengajak umat menghayati KAGAPA sebagai perayaan kesyukuran kepada Tuhan serta tanggungjawab memelihara ciptaan-Nya.

Beliau menegaskan bahawa hasil tuaian dan segala rezeki yang diterima merupakan berkat Tuhan yang perlu disyukuri dan dikongsi dengan sesama, terutama golongan yang memerlukan.

Friar Cosmas turut menerangkan bahawa ensiklik *Laudato Si'* yang diterbitkan pada tahun 2015 mengajak umat menghargai dan menjaga bumi sebagai “rumah kita bersama”.

Menurutnya, kerosakan alam sekitar bukan sahaja menjejaskan alam ciptaan, malah memberi kesan kepada kehidupan manusia, khususnya golongan miskin dan generasi akan datang.

Oleh sebab itu, beliau menyeru umat Katolik untuk mengamalkan pertobatan ekologi melalui gaya hidup yang lebih bertanggungjawab terhadap alam ciptaan Tuhan.

Ceramah itu turut disusuli dengan sesi soal jawab yang mendapat sambutan aktif daripada peserta. Antara isu yang dibincangkan ialah makna sebenar Kaamatan sebagai perayaan kesyukuran, pandangan Gereja terhadap adat yang melibatkan unsur pemujaan, serta konsep pertobatan ekologi. Friar Cosmas menegaskan bahawa pertobatan ekologi dapat diterjemahkan melalui tindakan harian seperti mengelakkan pembaziran, menjaga kebersihan dan menggunakan sumber alam secara bertanggungjawab sebagai usaha memelihara ciptaan Tuhan.

Ceramah ini diakhiri dengan doa penutup.

Bahasa *Apostolate* merakamkan penghargaan kepada Friar Crispus Mosinoh, paderi paroki Gereja Risen Christ, serta semua pihak yang telah menyumbang tenaga dan sokongan dalam menjayakan program tersebut. **Maria Anthony**

